



APRIL 2024

VOLUME 64 | NO. 04

Christian Thukizakna



Nupa Kipumkhatna

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndoulia

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplajem Guite

Lakman:- Kum khat ₹ 150.00;
Dak ah ₹ 200.00; **Bu khat** ₹ 15.00;
Gamdang US\$ 20.00

CONTENTS

1. EDITORIAL	: 01
2. NUPA KIPUMKHATNA	: 03
3. KIPUMKHATNA	: 08
4. INKUAN KIPUMKHATNA	: 13
5. BIBLE STUDY	: 19
6. GAMMIAL AW	: 24
7. DORCAS CORNER	: 30
8. CHILDREN'S CORNER	: 32
9. EBC INNSUNG THU	: 35
10. ORDAIN SUNNA	: 36
11. KIPAHTHU GENNA/ THUMNA MAKAI	: 38

Thusuah ding piakna:

Editor,
 Khristian Thukizakna
 Dorcas Hall, P. O. Box - 6,
 New Lamka,
 Manipur - 795006, India.

*Thusuah sung-a kigente
 Evangelical Baptist Convention
 Saptuam ngaihdan ahi kim kholkei.
 Thusuahte'n amau thusuah ah moh a
 pawtek ding uh.*

NUPA KIPUMKHATNA

Toupa Pathian in, “Pasal amah kia a-om ahoih kei. Amah panpihtu dia kilawm ka bawlsak ding,” achi hi (Gen 2:18)

Khalui a i thupi ‘Inkuan kipumkhatna’ chih ahi a, tukha in ‘Nupa kipumkhatna’ ahi a, kha nawn chiangin ‘Nu-le-pa leh tate kipumkhatna’ chih ahi leuleu ding hi. Hiai thil thumte kinai mahmah lah atuam chiat a ahihna uh leng om hi. Thu lungluthuai petmah leng ahi a saptuam miten sut veng veng tuak mah ahi. Huchi ahihlaini nupa kipumkhatna kichi genchet thil baihlam lou khat ahi. A thupina lam gen leng Pathian lungsim a kipan hitel, a siangthouna lam gen leng Pathian patkhiak ahi a, kinaihna (intimacy) lam gen leng khovel a tehpih ding omlou kinaihna thupi pen “sa khat” suahna ahi. Nupa kipumkhatna huchi tela thuk leh thupi chih theiin melmapa setan in nupa kal suksiat ding sawm tawntung hi. America leh Europe gamte khawng ah nupa kal buaina a nasa mahmah hi. Pathian thil geldan apan pialkhia in mun khenkhat ah “boyfriend,” “girlfriend” khawng achi ua, nupa hihna tuh nidanga naupangte kitengta neih sang in a hou ngaih zaw uhi. Khualzin kawm a kitengta neih, Hotel khawnga kitengta neih, park khawnga kitengta neih chihte thil lamdang ahi nawn kei hi. Nupa kal siatna atam semsem leh Pathian geldan a kepbit apoimohna alian semsem hi.

Nupa kitenna Pathian thilgel tuambik ahi. Pathian in hinna nei ganhingte asiamkhit nungin Adam panpihtu ding ana omkha kei chih Bible in agen hi (Gen 2:20). Huai tuh Pathian in hoih asakei chih Gen 2:18 in agen hi. Huaiziakin, atuam mawngmawng in Adam ading in akithuahpih theih ding mihing dang khat amah taksa apan a bawlkhia hi. Adam bel mihing buching ahi, himahleh amah kia a aom ding Pathian in hoih asa kei hi. Huai a hoihlou pen ahoih asuah theihna ding in mihing dang khat a bawl nawn a tuapen numei kichi hi. Pathian in kitenna leh nupa a omna anak ngaih poimoh dan leh asiangthou dan hiai ah amuh theih hi. Adam ziding pen sing-le-gua leh ganhing khawng dan a bawl thei lua hinapi tuadan in a bawl kei a Adam ‘nakguh’ apan tektek in a

bawlse hi. Adam zi gotna dingin Pathian in Program tuam vilvel khat bawl in kitenna ana bawlkhia hi. Hiai kitenna masa hun tuh Pathian siangthouna koppih a mihing leh Pathian akithuah hun lai uh khelhna khovel a lutma ahi zomah hi.

Kitenna Pathian geldan ah pasal khat leh numei khat kitenna ahi (t 22). Tulai hun ah Pathian thilgel bohsia in pasal leh pasal, numei leh numei kiteng khovel ah a ki gen nasa mahmah hi. Pathian dan bohsiatna lianpen khat ahi. Adam lawm ding pasal hoihsa hileh Pathian in pasal dang khat bawl thei ahi, himahleh bawllou hi. Leitung luahdim baih deuhna dingin Pathian in numei nih-le-thum leng bawllou in *numei khat* mah bawl hi. Leitung ah zi khat sanga tamzaw neithe culture khenkhat om hi. Eilak ah leng vangtah ziaka zi nih neikhate en vengveng leng amau damlai hiam asihnung uhiam a insung buailou khat leng omlou phial ahi. Huaiziakin, khangluite'n 'zi nih neih zaw ki hamsiatna dia leng hoihlou' ahi, ana chi hial uhi.

Nupa kipumkhatna kichi pianken a thil hithei ding a Pathian in agel ahi (t 23). Hiai a Adam kampau' tuhun a ei paua ahihna tak lehkhia haksa khat ahi. Guh leh sa kibang ahih chih genna kia ahikeia tuasanga thuk zaw Adam khophawkna in tua mihing dang pen amuh takin ahihna uh kipehtuah khat om chih agenna ahi. Scientific theihna dan a thil kibang genna kia hilou in salam leh khalam a kipumkhatna gen khiakna masa ahi. Huai ziakin Pathian mah in "sakhat ahita ding uh" achi hi (t 24). Bible pumpi ah nupa kipumkhatna chihlauh kizopna dang te "sakhat" suahna ahi chiin akigen ngeikei hi. Nuta-pata ichihte leng ahong pichin Chiang un adang genlauh lampi a tonkhawm nasan leng azum pawl ki om hi. Pathian geldan Nupate kipumkhatna ah bel taksa leh lungsim a pumkhat suak ahihman un apumpi uh leng aneikhawm ua, alungsim uh leng aneikhawm ua, ahinna uh leng anei khawm ua, aneih-le-lam uleng anei khawm ua, amau bawlp a Pathian leng anei khawm uhi. 'Kuamah in amah sa mah a hongei ngal kei a, avak in a deihtoh zaw nak hi, Khrist in saptuamte avaka a deihtoh mah bang in (Eph 5:29). Hiai Nupa kipumkhatna tuh inkuan leh nam leh gam kipumkhatna ding a suangphum poimoh ahi. ■

NUPA KIPUMKHATNA

- Rev. E. Paukhanlian, EBCC. Zion, New Lamka

Amasa in simtute i Toupa Jesu Khrist min in chibai ka hon buk hi. Tukha ithupi poimohtak “NUPA KIPUMKHATNA” chih thupi gelh dia deihsakna hon pia Heutute tung leh hun hoih hon pia i Toupa Pathian tung ah kipahtu ka gen hi. “Nupa Kipumkhatna” chih thupi i Laisiangthou thute pansan in, enkhawm in, kikum khawm leng ichi hi

Tukha i Thupi “Nupa kipumkhatna” chih thumal nih “Nupa” leh “Kipumkhatna” kigawm ahi. “Nupa” ichih chiangin Pasal khat leh numei khat kizopna/kigawmna or kitenna aneih chiang un nupa akichi hi. Nupa bawltu leh gawmtu masapen tuh Pathian ahi (Gen.2:21-24). “Kipumkhat” ichih chiangin “Sakhat” “Pumkhat” “khat a gawmkhawm” chihna ahi. Jesu’n kimakna thu toh kisai Pharisaite a dawwna ah “Atung a kipan amau bawlp’a’n numei leh pasal a bawl leh, hiai ziakin pasal in anu leh apa apaisan dinga, huchiin anih un **sapum khat** ahong hita ding uh, ... huchiin nih ahita kei ua, **sapum khat** ahi zawta uhi. Huaiziakin Pathian in a **gawmsa** mihing in khen kei hen. (Matt.19:5-6)

1. KITENNA BAWLA OMNA

ZIAK: Toupa Pathian in thilsiam abawl teng teng lak ah “a hoih kei” achih tuh “Pasal amah kia a aom” ahi (Gen.2:18). Adam poimoh leh a hinna a kisas hihbuchin ahieh theihna dingin Pathian in Adam taksa a pan nakguh khat lakhia in numei (Evi) a bawl hi. Ganhing teng teng Adam kianga pi a omte “amah panpihtu dia kilawm” a omkei, chi hi (Gen.2:20). Adam bangbang, asa bang sa nei, aguh bang guh nei, amah apan lakkhiak –numei, amah panpihtu dia kilawm Toupa Pathian in Adam adia abawl, lungsim, sa leh kha a pumkhat/sakhat hi din Pathian in Adam kiang ahonpi hi. (Gen.2:21-24).

1.1 NUPA A KIKHAWL DINGIN(Companianship):

Pathian in Adam amah vuak a om ahoih kei achih in Adam in

kithuahpih ding salam, khalam leh lungsim lam apoimoh ahih dan Pathian in mu in, amah toh akituahpih ding, amah pumpi apan lakhia in numei a bawl in amah kiang pia hi. Salam mahmah a lawmta banga kituak tak a tengkhawm, semkhawm leh hingkhawm ding in ahi. Pasal leh zi kizopna leh kipumkhatna in Khrist leh Saptuamte kal a kizopna leh kipumkhatna thuktak om a ensak ahi. (Eph.5:31-32)

1.2 TA LEH NAU SUANG DINGIN(Fruitfulness): Toupan “Chi tampi suang in hong pung unla, leitung luh dim un.....” chi’n Adam leh Evi vualjawl hi. (Gen.1:28). Adam leh Evi siam a omna san dang khat tuh ta leh nau suang ding ahi. Zek kibang, Pasal leh pasal, numei leh numei kitenna tung tawn in nau neih theihna dan omtheilou ahihman in Pathian in kitenna abawl dan hilou ahi chih imu thei hi. Mihingte khelhna a pukma tham un pasal khat leh numei khat kitenna, pumkhat, sakhat suahna tung tawn in suan leh pak suang din a vualjawl khin hi. Nu-lepa omkhawmna Pathian in kitenna huang sunga zat dia, siangthou tak a zat dia thupiak

ahi. Kitenna tellou a nupa banga omkhawmna khelhna liantak ahi. Pathian hehna leh vaihawmna sapkhiakna ahi. Huaiziakin khelhna lak ah ikisiangsak ding uh.

1.3 BUKIMNA DING

(Completeness): Adam in “Hiai zaw ka guh bang guh nei, ka sa bang sa nei ahi, pasal apan lakkhiak ahih ziakin numei chih ding ahi” (Gen, 2:23). Pathian in Adam nakguh khat ala khia in numei a bawl hi. Adam nakguh khat lakkhiak na mun a awng a om, numei, Evi toh kitenna a kigawmna hong om chiangin bukimna ahong piang hi. Huai ziakin Laisiangthou in “Pasal numei lou in a om thei kei a, huchimah bangin numei leng pasal lou in a om thei kei” ana chih bang in thil a omna ding mun a aomkhak ma akisam khat om a, bukimna a om thei kei hi. Hiai ziakin kitenna in lungkimna leh bukimna ahon tun hi. Nupa kitenna tung tawn a kipumkhatna alah khiak bangin Khrist leh Saptuamte kitenna ding tunung chianga atak takin a hong tung dinga, huai hun chiang in kipumkhat in atak gam ah ilengta ding hi.

Nupa kipumkhatna in Khrist leh Saptuam kal a kipumkhatna a ensak hi: Paul in nupa kal kizopna, kipumkhatna etsakna hoihpén din Christ leh Saptuamte kal a kizopna ana gen hi (Eph.5:25-29). Adam apan lakkhiak nakguh in numei bawl ahih mah bangin (Gen.2:21), Khrist in cross tung a athuakna leh a sihna apan in saptuam a piang hi (Eph.5:30-32).

Khrist leh Saptuamte kizopna bang pasal leh numei khempéuh zuih dia etsakna ahi:

i) Nupa kipumkhat ahih ding Pathian gelsa ahi: Mi masapén, Pasal khat leh numei khat kitenna Pathian dinsuah ahi. Pathian agawmtu Pastor masapén ahi.

ii) Nupa kipumkhatna hih Salam leh Khalam ahi: Kitenna tung tawn in “sakhat” ahong hita uh Toupan achi (Gen.2:24. Mat.19:5-6). Pathian in Evi, Adam kiang a api lai in “Hiai pen zaw ka guh apan guh, kasa apan sa ahi. Pasal akipan lakkhiak ahih ziakin Numei chih ding ahi.” achi hi (Gen.2:23). Pathian in Adam a kipan alakkhiak a abawl

Numéi, Adam kianga pi a om, amah sa leh guh mahmah ahi chi a, ana san apan- lungsim leh kha ah sakhat/pumkhat abawl in hong om a, huai mah tuh Pathian lungtang a lemgelna omsa ahi, huai thudik tuh puankhiak in hong om tuh “Pasal in anu leh apa apaisan ding a, azi ah abelh ding, Huchi in sa khat ahong hita ding uh” chih ahi (Gen.2:24). Hiai bang hi ding ahi chih Pathian lungsim ah gelsa a na om khinkhian Paul in “Hiai thuguk a thupi hi” (Eph.5:32) chi in “Thuguk thupi”-gen khiak a om nailou thutak kisel ahi anachi hi. Paul in “himahleh ken zaw Khrist leh Saptuamte toh kisai ahi ka gen” achi hi. (Eph.5:32)

Paul in Khalam/salam kipumkhatna hong om dan Korinthte kiang hichi'n na gen hi. “Na pumpi uh Khrist ka hiang ahi chih na thei kei ua hia? Khrist hiangte laksak in kizuak hiang ding peuh in na bawl dia hia? Bawllou hial ding. Ahihle kizuak zop amah toh pumkhat ahi uh chih na thei kei ua hia? Anih un sapum khat ahi ding uh, a chi ngal a. Toupa zop bel amah toh kha pumkhat ahi uhi (I Kor.6:15-17).

Kitenna tungtawn in pasal khat leh numei khat hong kigawm chiang un “sakhat” hong suak uhi. Apoimoh mahmah khat i theih ding ahiehleh pasal hi in numei hileh a koppih a dia lungsim tengteng, lungtang tengteng leh kha tengteng a sitneilou a kipiakna thuchiam a honchiam khith phet un, amaute nupa a puan ahieh toh kiton in khalam a pumkhat/sakhat a siam ahita ua, khentheih hinawn lou, sihna lou ngal khen theih hitalou ahi. Laisiangthou in “Pathian in a gawmsa mihing in khen kei hen” (Matt.19:6). Himahleh, Lungsim, lungtang leh khalam a kipiakna omlou kitenna ah kipumkhatna, sakhatna aom thei taktak kei hi.

Nupa kipumkhatna hun tomkhah, ikituah sung or ihoih leh hat lai sungteng kia a ding ahikei a, a omden ding, damsung a ding ahi. “Pathian gawmsa mihing in khen kei hen” achih in bang teng hong tung mahleh...sihna chihlough, nupa kikhenna chih om theilou ahi achihna ahi.

2. NUPA KIPUMKCHATNA DETDOU OMTHEIHNA DING: Nupate’ kizopna in

sakhat/pumkhat a ahon bawl, damsung tan a dia chih himahleh nupa kipumkhatna susethei, sukekthei melma nei i hihman in, niteng leh hun teng a i kepbit ding nupa chih mohpuak ahieh man in, kipumkhatna kip leh det om theihna ding in nupa chih in naktak a panlak angaih ban ah aman i piak ding tampi omte lakah bangzah hiam enkhawm leng i chi hi.

2.1 KIPUMPIAKNA BUKIM NEIH DING: Kitenna hun tomkhah sung ading hilou in damsung a ding a akoppih adia kipumpiakna, sitnei lou a kipiakna ahi. Numei leh Pasal in kiteng dia thupukna abawl hun ua, sihna loungal in akhenlough dia thupukna ahi khawm pah hi. Kitenna thuchiam ah “tuni a kipan” chih in damsung adia i koppih adia sit neilou a kipumpiakna thuchiam ahiehman in bohsiat lough ding ahi. (Ekli.5:4)

2.2 NUPA KAL GINOMNA KEPBIT: Kitenna tuh sapumkhat hihna leh kipumpiakna mai a tawplou in zi leh pasal kal ah ginomna/muanhuaina a poimoh hi. Pasal a zi adia a ginom bangin

zi leng amah pasal a dia aginom ding ahi. Ginomna Kha gahtelak a khat ahi (Gal.5:22). Billy Graham in “Nupa hinkhua nuam-suangphum tuh Pasal in a zi muangzou taka a it a, zi in a pasal angaih thupi hih ahi” achi hi. Tulai khovel zalen tak lakah nupa kal a ginomna taksap zia in nupa kal kikhenna, insung kitam zak, naupang tampi nu leh pa dam zenpi a tagah, genthei tampi muh ding a om hi.

2.3 SITNEILOU KIPUMPIAK ITNA NEIH DING:

Laisiangthou in “itna ahihleh lepchiahna tellou in hi hen (Rom.12:9). ‘Ki-ittuahna lou ngal kuamah bangmah bakei un, amah mihinpih itpa’n dan a zuikimta hi (Rom.13:8). Zi leh Pasal tuh sitneilou kipumpiak itna- Khrist in Saptuamte a it a, asik ua a kipiak bang itna nei dia thupiak ihi. (Eph.5:25). Pasalten amau pumpi mah banga amau zite a it ding uh ahi. Amah zi itpa amah ki it ahi (Eph.5:28). Ziten leng a mau pasalte uh it din hon hasuan hi (Tita 2:4) Itna tellou/neilou in nupa kipumkhat theilou hi. Itna gui in nupa i kikanxhawm ding uh.

Tulai in nupa khenkhat nidanga ki-it, kingai mahmah, ki-it ziaka ngaihpen toh tengxhawm hina pi, tua lah insung khat a khosa khawm himahleh khovel tuam a khosa bangmai a khosa nupa tampi omta, sum-le-pai ziaka buaina, ta-le-naute zia haksatna, nupa kal kilem louhna/kituah louhnate ziaka lungkham, lungkia leh kingaisia mi tampi zong om theih ahi. Hiai bangdan i nupa kal dinmun ahihleh athak in kingaihtuah ni. I nupa kal a asam khat om hikha ding hi. Kana khua kitenna ah Jesu chial ua, a uain uh beita/kangta hihdimsak a, amasa sang a khumzaw in bawl hi (John.2:2-11).

2.4 KINGAIHNIA MNA LUNGTANG:

“Khrist laudan siam in kiniamkhiak chiat un” (Eph.5:21). Nupa hinkhua nuam leh pumkhat hihna kepbit a hih theihna dingin kingaihniamna lungtang a kivat/neih angai hi. Kingaihniamna leh itna a kikhen theilou ahi uhi. Pathian itna ahi chih i thei, himahleh bangziak a eite hon it ahi chithe i hiam i chih leh kiniamkhiakna thupi tak toh Jesu Kross a asihna zia ahi

(Phil.2:5-8). Nupate tuh Khrist lungsim pu a kiniamkhiak tuah dia hasot i hi (Eph.5:21). “Toupa kianga na kiniamkhiak bang un noumau pasalte kiangah kiniamkhiak un” chi a thupiak i hi (Eph.5:22). Upaten “lei leh ha zong achang in kikei kha thei zel uhi” achi bang un nupa niteng a tengkhawm, semkhawm, nekhawm i hih man un, akallak ah kinak kisel hun omkha thei hi. Hiai bang hun a nupa kal kipumkhatna a keklouhna dingin “kei ka khial hi, hon ngaidam in” chi thei lungtang kingainiam omna ah kilemna leh kituahna a om pah hi. Himahleh kingaihniamna

lungtang neilou, kiletsakna, kisaktheihna leh dikzaw hih kituhna ah, kinak kiselna a pian ban ah nupa kal kikhenna tanpha leng a piangkha thei hi. Hiai bang atun louhna din akhat zaw pen kiniamkhiak zawk a om angai hi. Kingaihniamna hi niamna hilou in thupina leh vualzohna ahi zaw hi (Phil.2:9). Huaiziakin Khrist itna apan suak kingaihniamna lungtang nei a, lungsim niamlak a, eisang a midangte hoih sazaw leng (Phil’2:3), kilemna kituahna leh kipumkhatna hong piang ding hi. Toupa’n Simtute tengteng hon vualjawl chiat hen. ■

KIPUMKHATNA

- Rev. Dr. Luaichinthang, *Bungmuul*

Hiai thumal kipumkhatna kichi bang genna ahi diam aw? Kipumkhatna i chih lungsim khat pu a, tup leh ngim kibang nei a, pankhawmna ahi. Ephesa 4:3 ah, “Itna khauhual a kankhawm a om in, kha a kipumkhatna lenkip tinten dingin kihanchiam un” a chi hi. Hiaia agen kipumkhatna khat peuh hilouin, kha a kipumkhatna ahi a gen. Kha a kipumkhatna i chih chiang in, piangthak, Khasiangthou tang mite khalama akipumkhatna uh ahi i gen.

Kipumkhatna bang hilou ahia? Eimah hihna beimang khopa khat suahna ahi kei. Hindute kisinsakna tampite laka khat hichibang a om hi. Pathian

pen meiphualpi toh teh theih ahi. Mihingte leng huaisunga tel i hi uh. Khelhna ziakin huai meiphualpi apan mei-ek bangin mihingte i lengkhia

uhi. Sahkho laibu in hotdamna ngahna dia lampi a gente diktak leh kimtak a zuikim thei a omleh, tuaten hotdamna ngah ding ua, tuabanga hotdamna angah chiangun huai meiphualpi ah lenglut nawn ding ua, pathian suak in, amah pen om nawnlou ding hi. Bible in a gen kipumkhatna, huchibanga ei mimal i hihna beimang a, Pathian suak ding chihna ahi kei.

Bible hon sinsak danin, mihinga khatvei piang peuhmah in, a sitheilou kha nei a, huai pen tangtawn in omden ding hi. Na kha i chih nangmah na hihman in, hotdama na om poimoh lua hi. Hotdama omlou zaw a gen a gen vuallouh, a bei chih om ngeilou gentheihna ahi. Hiaziak takin Pathian toh kipumkhat a om a poimoh hi.

Pathian toh kipumkhat a poimohna bang hiam? Mihingte Pathian in ahon siam pattung in, amah toh kipumkhat a om dia ahon siam i hi. Himahleh, thuman louhna, khelhna ziak in hiai Pathian toh kipumkhatna ahong kisia hi. Hiai kipumkhatna kisiat ziak in mihing hinkhua ah thil haksa leh gimthuakna tampitak leh

thupitakte tung in, sihna tanpha tung hi. Hiai thil poitak leh thil haksa petmah ahi. Hiai in Pathian toh kipumkhat a omnawn a nak poimohdan gen hi.

Bangchi a Pathian toh kipumkhat nawn thei ding? Hiai a dingin mihingten bangmah hihtheih i nei kei. Himahleh, poimoh lua ahihman in, Pathian mah ahong kipankhia hi. Van apan a tapa tang neihsun honsawl in, mihingten Pathian toh kipumkhat nawn, kizopnawn theihna ahon neihna dingun, mihingte khelhna man pua in, Kros ah hong si a, siam a tan theihna dingun ni thum nung in han apan vualzou in thounawn hi. Hiai Jesu Khrist thilhih mi kuapeuh in amah mimal khelhna mahmah gawtna ahi chi a kibulhten hotdamna ngah uhi. Hiai in Pathian toh kipumkhat nawn theihna ahon tun hi.

Pathian toh kipumkhat a om louh a poina bang a om a? Mihingte Pathian in amah batpih a ahon bawl, amah hinna hu ahon hatkhum a hing ihi ua, huaiziak in, amah toh i kipumkhat chiang kia a lungnopna taktak, a bukim

nei thei phet dinga Pathian in ahon siam i hi uhi. Ahihhang in, dahhuaitakin, mi tamtakin, hiai tua i gen lungnopna taktak, kipahna bukim kichi mangmat banlou, ngaihtuah banlou, a huchi ding lel mah sa in i om uhi. Hiai dahhuai petmah hi. Pathan in lah, amah batpih ngeingei a honsiam, amah toh i kipumkhat chiang kia a kipahna bukim nei dinga hon bawl, himahleh, melmapan tuate himhim ngaihsun banlou, lunggulh banlou ding in hon koih hi. Huchi in, Pathian toh kipumkhat a om lunggulhna i mangsak uhi.

Himahleh, hiai pen, mihing sunga Pathian in a koihsa ahiman in, mang paisuak, mangden thei mawklou hi. Huchi a hihman in, mi tengteng lungsima om, David in hon genkhia a, "Sakhital luita tui duh a nak hawkhawk bang in, Ka hinna nang hon lunggulh in a nak hawkhawk" (Sam 42:1) a chi hi. Mihingte poimoh thupipen zaw Pathian toh kipumkhat a om ahi.

Bangchi a Pathian toh kipum khat a om thei ding? Pathian toh kipumkhat a om theihna ding in, Amah bangmah

hihkhelh nei hetlou Pathian pen a omdan ngeingei in na om henla, ei a diklouten vanaih lehang dik ding ahi. Himahleh, huaipen, hitheilou ding ahidhan aman theilua ahiman in, amah a hong kipatkhia masak a poimoh hi. Mihingte, khelhna mialnuaia, khophawklou a, tangtawn manthat ding ngakte, i manthat louhna ding a man na ahon sempan hi. Khophawklou a om i chih, nuamsa, lungkim leh kipak hikei mahlehang, a huchilel ding mah dan a ngaihsun in, bangmah theilou i hihman a, tuadan a om det mai louhngal hihdingdan dang omlou dan in i na om uh, i chihna ahi. Huai dinmuna mihingte i om lai un, Pathian in A tapa mihingte lakah hon sawl hi. Mihingte khelhna gawtlouh theihlouh ahiman in, huai gawtna, Pathian tapa in hong thuakvek sipsip hi. Huai nung tuh, mihingte i khelhna kisika, huai Jesu thuakna kei khelhnate zia mahmah ahi chi a kibulh utte tungah Pathian ngaihdamna hongtunga, tuabang mite tuh Pathian toh kipumkhat a om theite ahita uhi. Jesu mi tengteng a dia si ahihleh, mi tengteng hotdam

hisa hilou maw, chipawl om hi. Huai a hihtheihlouna tamtak om hi. Khat lel gen lehang. Khelhna kisiklou, poisaloute van-gam tung mawkle uh van-gam a leng khelhna hon polut ding uh ahi. Huchi a hihman in, khelhna kisik a, poisa a huate kia van-gam a tung ding uh.

Pathian toh kipumkhat a bangchi om ding? Utna, lunggulhna i neih a, huai i lunggulhna i sepkhiak ding ahi. Huai utna, lunggulhna Pathian in nei mahmah a, huai ahitheihna dinga atapa honsawl a, kipumkhatna a om theihna dinga, Kros tunga hongsi a, ni thumni a thounawn ahimanin, aman, a hih ding tengteng zou khin hi. A taksuak theihna dingin ei mihingten huai i kipahpih ua, i pom ua, amah kiang i naih uh kul hi. I kipumkhat uh aman deihlua a, amah lam a hihding om teng aman hih khin vekta hi. Tu in en, huai a dawnna i piak a, mah i naih uh poimoh hi.

Pathian toh kipumkhat a om a haksa hia, nuam? Pathian toh kipumkhat a om kan a nuam a omlouh ding ahi. Huaisanga nuamzaw bangmah a om louh ding ahi. Eden huan apan

manthatna thupi lota, gamla pai lota, Pathian lunggulhna leng nei thei nawnlou in i om uhi. Huchi ahih manin, ‘*Hun tengin kon ngai hi*’ chih i lapi ahih a deihhuai kia hilou in a poimoh hi. Pathian toh kipumkhat a om a nopna theiban ding in Pathian in hon vualzawl chiat hen.

Huan, kipumkhatna leng, a dai deuh, a thuk deuh, a thuk theitawp chih na omlai hi. Huchi ahiman in, dai chik, a minpu lel ahih ding lauhuai hi. Huaiziakin, Pathian toh a thuk theitawp a kithuahna i neih poimoh hi. Laiiangthou in “Toupa na Pathian na lungtang tengteng, na lungsim tengteng, na hatna tengteng in, na it ding ahi” (Matt. 22:37) a chi hi. Hiai ah ‘tengteng’ a poimoh mahmah hi. Lungtang tengteng ahih Chiang in, a thuk theitawp kipumkhatna genna ahi.

Kipumkhatna koikoi ah a poimoh a? Nupa kalah poimoh mahmah a, Saptuam sungah poimoh a, Saptuam sungah leng, Committee tengteng sung, department tengteng sungah poimoh a, khotang ah poimoh a, gamsungah poimoh hi. Hiai i gente sunga kipumkhatna

a omlouh Chiang in, buaina namenlou tung hi.

Kipumkhatna bangchi tunsak theih ding ahi dia? Hiai i theih theihna dingin, kipumkhatna daltu i theihkhiak kul hi. Kipumkhatna daltute tuh, mahni deihdan kia chih tentunna, midangte ngaihdan leh deihdante thulaklouhna tuh, mi toh kipumkhatna daltu ahi. Huaiziakin, mi toh kipumkhatna a om theihna ding in, English thumal nih kul hi. Huaite tuh Accept leh adjust ahi. Accept i chih pom/sang chihna hi a, adjust i chih Chiang in kibawllem chihna ahi.

Hiai a i gen ut tuh, midangte, hong hichi deuhleh chih bangmah phut masak omlou a, amau hihna bangbanga pom genna ahi. Kon pom, kon san theihna dinga na hong hichihmasak phot poimoh i chih aleh, kipumkhatna om thei ngeilou ding a, hiai pen ikipumkhat khit chianga itna toh, lungsim liantak nei a, kibawlphat ding ahi. Huai ma, i hih bangbanga kipomsiam masak phot kul hi. Adjust i chih Chiang in, kibawllem chihna ahi. Amah hong kibawllem ding a phut masazo lou in,

nangmah kibawllem masazo lechin kipumkhatna om thei ding hi. Nang a pom phot inla, huaichiang in, nangmah amah toh kipumkhat thei ding in a poimoh bangbang in kibawllem lechin huchi in kipumkhatna hongpiangdinghi. Hiai tuh nupa kal ah leng poimoh mahmah hi. Amah toh ka kipumkhat theihna ding a, amah ka pom theihna ding a, amah ahong kibawlphat masak phut masaloua ahich bangbanga pomphot poimoh hi. Huaiziak in, nang hih ding tuh, ahichna bangbang in pom inla, amah toh kituak ding in nang kibawllem in. Mihingten, kiletsakna, kideihkhopna nei chiat i hi ua, huai in, hiai haksa hon sasak mahmah a, tampiten, huai i pal galkai zou kei ua, huchi in, kipumkhatna a om thei kei hi. Huaiziakin, kipukhatna aom theihna ding in, Korinthe kianga laikhak khatna, bung 13na a itna kigen i neih ua, tuabanga om i sawm uh poimoh mahmah hi. Huailou a hi theilou ding ahi. Kipumkhatna ding in itna alou theilou ahi.

Sianthouna a bukim Pathian leh khial lumlet, gilou pumlum mihingte kipumkhata a om nawn theihna dingun, khelhna neilou Pathian tapa Jes Khrist

in mihingte khelhna Kalvari Kros ah pua a, sihiph a, hana vuia om in, a ni thumni in vualzou in han apan thoukhia hi. Pathian in gilou pumlum mihing toh kipumkhat a om theihnawn ut hi. Himahleh, a sianthouna neukha leng niamsak theilou hi. Tua ahihman in, eite amah toh kithuahthei, kipumkhat thei dinga i kihisianthou ngeingei ding ahi.

Toupa Jesun, mihing leh Pathian kipumkhata a om theihna dinga Kros a ahong sihna leh thohnawwna tungtawna Pathian toh kipumkhat a omkhinta mihingte kipumkhat a i om ding hondalte tengteng nuaisiaha, Pathian deihna banga kipumkhata i om theihna ding in eite lakah Khasiangthou nasep hong hat semsem hen. ■

INKUAN KIPUMKHATNA

- Rev. Dr. Sonna Langzakham



I. Kipumkhatna Hilhchetna: Laisiangthou a kipumkhatna kigen ahihleh thil tengteng a kibatvekna ahihkeileh paidan khat zuih dikvekna ahi kei. Laisiangthou a kigen kipumkhatna ahihleh kizahtaak- tuahna leh kibatlouhnate om mahleh ki-it-tuahna ahi. Laisiangthou mun tamtak ah kipumkhatna a kigen hi. Ephesate 4:3 ah Sawltak Paul in, Noute hon henkhawm lemna ah Kha a kipumkhatna lenkip ding in nakpitak in pang un, a chi hi. Hiai Laisiangthou tang ah Sawltak Paul in lemna/kipumkhatna tuh Kha Siangthou toh a zomkhawm hi. Hiai in lemna/kipumkhatna tuh mihing' nasep hilou in, Kha' Siangthou nasep ahi chih ahon theisak hi.

II. Inkuan Kipumkhatna Poimohna: Laisiangthou a kipumkhatna kigente lak a tamlou ahihleh gingtute' kipumkhatna, inkuan' kipumkhatna, thumna a kipumkhatna leh Khrist toh kipumkhatna ahi. Kipumkhatna kigena hoihipen leh thupipen ahihleh Sam 133:1 ahi a, hiai ah Sam gelhtu in, En un, unaute kipumkhat a tenkhawm a hoih in a nuam mahmah, a chi hi. Huan,

Paunakte 6:19 in unaute lak a kikhenna omsak tuh Pathian in a muhdah thil gukte lak a khat ahi, a chi hi. Sawltak Paul, Sam gelhtu leh Paunakte gelhtu hasotna thute'n Pathian in kipumkhatna manpha a sakdan leh kipumkhatna hihsiat a poidan ahon theisak hi. Inkuan kipumkhatna tuh in-le-lou liantak, neih-le-lam tamtak leh sum-le-pai hauhna sang in a poimoh zaw hi. Nektawm zong a inn neu leh hoihlou chik toh khosa himahleng, inkuan a kipumkhatna i neihleh i inkuan tawn in Pathian' thupina taklat in a om hi.

III. Inkuan Kipumkhatna Dia Poimohte: Inkuan kipumkhatna ahiehleh amah in ahong piang mawk kei ding. Inkuan Kipumkhatna neihna ding in, inkuan a mite hihna ding, sep ding leh kisinsak ding a om hi. Huaite ahiehleh:

1. Piangthak Zi Leh Pasal: Inkuan Kipumkhat neihna dia suangphum poimohpen leh masapen ding ahiehleh zi leh pasal mipiangthak hih ding ahi. Piangthaklou zi leh pasal in inkuan kipumkhat bawl thil hitheilou hial hikei mahleh a haksa mahmah ding hi. A haksat

ding ziak ahiehleh kipumkhatna tuh mihing' nasep hilou a, Kha Siangthou' nasep ahiehziak ahi. Piangthaklou nupa in inkuan kipumkhatsaktu Kha Siangthou a nei kei uhi. Johan 8:44 ah Judami piangthakloute kiang ah Jesu'n, Nou zaw na pa uh diabol apan pawt na hi ua, na pa uh deihlamte na hih uh, a chi hi. Hiai akipan piangthaklou nupa tuh Setan sikhate ahi ua, Setan deihlamte a hih uh, chih i thei hi. Setan' deihlamte lak a khat ahiehleh inkuan hihsiat a, huai inkuan kisia tawn a khotang hihsiat, khotang kisia tawn a saptuam hihsiat leh saptuam kisia tawn a nam hihsiat ahi. Huaiziak in, inkuan kipumkhat neihna ding in zi leh pasal mi piangthak ahieh ding uh ahi.

2. Inkuan Kipumkhatna Dia Thumna: Jakob 4:2c ah Jakob in, Na nget louh ziak un na nei kei uh, a chi hi. Matthai 7:7 ah Jesu'n, Ngen un, piak in na om ding uh, a chi hi. Pathian tuh it lou leh tai lou a gingtute taksapte pepa ahi. I taksapte muhna ding in, Pathian kiang a nget ding ahi. I nget keileh i taksapte Pathian in ahon pe kei ding hi. Chihtakna leh ginna toh i taksapte i ngetleh piak a om ding in Pathian in

thu ahon chiam hi. Inkuan tamtak in kipumkhatna a neih louh ziate lak a khat ahiehleh Pathian kiang a nget louh ziate uh ahi.

3. Zi Leh Pasal

Kipumkhatna: Zi leh pasal in kipumkhatna a neih kei uleh inkuan kipumkhatna a om thei kei. Kina, kisel leh kimohsa tuah gige nupa in inkuan kipumkhat a bawl thei kei uh. Nupa kipumkhat louhna in tate leh tute a lohsawn ding a, inkuan ah kikhenna a om zaw ding hi. Upate paunak in, Sakhi a pi a san leh a nou leng a san a chi hi. Zi ahiehkehleh pasal in amah thu kia thusa a, a thu kia a chih tuam tentun gige louh ding ahi. Amaute'n kisel leh kinak tawpsan a, inkuan kipumkhatna ding ahieh phot leh a mimal dikna tanpha uh a khahkhiak ding uh ahi. Hiai khenkhatte ading in thil haksa ahi mai thei, himahleh, hiai thudik theih ding ahi: Mimal dikna sang in inkuan kipumkhatna a manpha zaw hi.

4. Thu leh Thil Neute A

Kithuakzohna: Ephesate 4:2 ah Sawltak Paul in, Kingaihniamna leh migitna tengteng, kuhkalna toh itna a

kithuakzou chiat in, a chi hi. Kolossate 3:13 ah Paul mah in, Kuapeuh in kua tung ah leng thubuai nei hile uchin, kithuakzou chiat in kingaidam tuah unla, Toupa'n ahon ngaihdam khit taak bang in kingaidamtuah chiat un, a chi lai hi. Hiai a Kithuakzou kichi ahiehleh kikhiek tuan lou ding thil neute ngaihsak lou chihna ahi. Thupil in, Suang in kidengtuah ni chileng, suang kitasam ngeilou ding i hi, a chi hi. Inkuan ah mimal chih in eimah' lunglutna, deihdan leh chindan tuamtuam kinei chiat hi. Hiai i neih tuamtuamte'n inkuan kipumkhatna hihse ding ahieh kei nakleh, kitheisiam a kithuakzoh chiat ding ahi. Eimah deihdan toh kituak lou peuhmahte pom theilouhna, kisoiselnah leh kiphunsanna a om Chiang in, inkuan ah kipumkhatna a om thei kei. Juda 16 ah Juda in, Phunhatna leh kimohsakna tuh mikhial siamlouhtang dingte hihna ahi, a chi hi. Huaiziate in, thu leh thil neute ziate a kiphunsanna leh kimohsakna tawpsan a, kitheihsiamna, kipompihna, kithuakzohna leh kibatlouhnate kipahpihna neih ding ahi. Hiai in inkuan

ah kipumkhatna neisak in a khangsak ding hi.

5. Eimah' Mit A Singtum Lak Khiak Masak: Matthai 7:3-5 ah Jesu'n, Bangziak a nangmah mit a singtum om ngaihsak lou a, na unau' mit a ninneng neuchik mu na hia? Ahihkeileh bangchi in a na unau kiang ah 'Na mit apa'n huai ninneng neuchik hon lakhesak ve, na chih theih ding? En in, nangmah mit mahmah ah lah singtum a om ngal a? Nang milepchiah in na mit apa'n singtum lakhe masa in, huchi in na unau mit akipan ninneng neuchik lakhe ding in kichiantak in na mu thei ding hi, a chi hi. Nangmah hoihbukim in na kikoih maw? Ahihkeileh na khelhnate kisiamtan tawm-tawm na hi hia? Nangmah mit a singtum om ngaihsaklou in, na inkuanpihte mit a ninneng om mu in amaute mohsa in bawldik na tum maw? Nangmah khelhna awlmoh masa in inla, ngaihdamna ngen masa in. Huchi in na inkuanpihte khelhna na bawldik thei ding hi. Adam leh Evi in a sia leh hoih theihna' singgah a nek khit nung ua a kimohsaktuah bang ua, inkuan a kimohsaktuahna a om chiang

in kinakna in a zui a, kinakna in kikhenna a piangsak hi.

6. Khelnate Ngaidamna: Matthai 6:12 ah Jesu'n a nungzuite thum dingdan a sinsak ah, Ka tung ua khialte ka ngaihdam bang un, nang leng ka khelhna uh ngaihdam in chi in thum un, a chi hi. Hiai Toupa' Thumna ah mihing in niteng a khelhna ngaihdamna kipoimoh ahihdan i mu hi. Mi'n i tung a thil hihkkelh khat lel zaw ngaihdam a baihsam kha mai thei. Himahleh, niteng a i tung a thil hihkkelh neihte: Etsakna in, kithu neisaktak a thagum a hon nawk gige pasal ahihkeileh soisel hat leh phunchiak zi ahihkeileh amah masial tanu thumanglou ahihkeileh zekhemhat tapa chihte ahihle a khelh teng ua ngaihdam zihzeh a haksa ding hi. Hitamaleh, i tung a a-khelh teng ua ngaihdam zel ding ahi, ngaihdam theih nawnlouh ahihkeileh ngaihdam zoh louh khelhna omsak louh ding ahi. Peter in Jesu kiang a ka unau in bangzah vei ka tung ah hihkhialleh ka ngaidam dia? Sagih vei tan ahi diam? chi a dot lai in, Jesu'n a kiang ah sagih vei mun sawmsagih tan a chi hi (Matthai 18:22). Hiai a Jesu'

dawanna in a gen ahiehleh 470 vei tan ngaidam ding chihna hilou in, ngaidam theih ding zah bikhiah omlou in, na tung a a-khelh teng in ngaidam in a chihna ahi zaw hi. Ka tung ua khialte ka ngaidam bang un, nang leng ka khelhna uh ngaidam in, chi a na thumna a-tak na zuih dingleh, na tung a khialte a khelh zahzah uh na ngaidam ding ahi. Pathian in eimah khelhna a ngaidam theihna ding ahiehleh midangte khelhna i ngaidam masakna ah a kinga hi. Midangte khelhna i ngaidam keileh, Pathian in eimah khelhna a ngaidam kei ding hi.

7. Kikamsanna Khauh a Kihounate a nem A tawpsak Matthai 18:15 ah Jesu'n, Na unau in na tung a thil a hihkhelhleh pai inla, amah leh nang kia theih in a khelhna hilh in; ahon ngaihkhialeh na unau zou na hiding, a chi hi. Hiai Jesu' thupiak ahiehleh inkuan leh saptuam hinkhua a kizuilou pen hiding in ka gingta. Na unau in na tung a thil a hihkhelhleh amah kiang a pai lou in, midang kiang ah pai ken. Huan, a khelhna leng im mang mawk tuan ken. Amah kimuhpih lou in koihdap

mai ken. Ngaih zam theih louh khelhna ahiehleh Jesu'n na unau kiang a vapai ding in thu ahon pia hi. Vualzoh leh tungnun deihna leh tupna a kiang a vapai ding hilou in, Toupa leh nangmah adia amah na zohkikna ding deihna leh tupna a na vapai ding ahi. Hiai thupiak nangmah in zui inla, na tate leng sinsak in.

8. Kidangkoihna in Kizopna

A Vuaisak Louh: Tup mawng hilou a, na unau na hihheh khak zenzenleh, hiai in amah toh na kizopna a vuaisak louh ding ahi. Na kizopna uh vuaipan a na theihleh, Jesu'n na unau kiang a vapai ding in ahon sawl hi. Matthai 5:23 ah Jesu'n, Maitam a na thilpiak na lat lai a, na unau in na tung ah lunghihlouhna a nei chih na theihkhialeh, na thillat nusia in pai inla, na unau vakilempih in, huai zoh in na thilpiak lan in, a chi hi. Mi kuahiam na tung a lungkimlouhna nei a nangmah akipan kidangkoih a na theihleh a kiang a vapai inla, amah houlimpih in kileppih in.

9. Midang Tungtang

Houlimtu Hilou A, Lemna Bawltu Hih: Hun tamtak ah kituaklou mite a kilemkik

thei nawn kei uh. Huchi in, midang kuahiam kiang a a kituahlouhna thu uh hilh in a houlim zel uhi. Hiai bang a lungkimlouhnate midang kiang a gensawn a houlimna neih in kituahnawwnna ding a gamlasak thei hi. Kituaknawn thei loute kal a lemna bawltu hiding in Jesu'n thu ahon pia hi. Matthai 5:9 ah, Jesu'n Lemna bawlte a hampaha uh, Pathian' tate chih a om ding ahi ngal ua, a chi hi. Mi nih ahikheileh nih sang-a tam zaw kal a kitheihsiamlouhna ahikheileh kituahlouhna om ahi chih na theihleh ngaizam mai lou a, Laisiangthou toh kituak a hihveng ding a amaute na panpih ding ahi. Na lawmpa i vamu ding a, kilemna a om thei hiam i ngaihtuah khawm ding uh chi a, a kilemloute lak a khat zaw samsam na chial ding ahi.

10. Poimohlou Thu Leh Thilte A Kingaihniamna: Pianken a kingainiam ut lou mihingte i hi uh. Himahleh, midangte ma a kingaihniamna hun nei ding in Pathian in ahon deih hi. Philippite 2:3 ah Sawltak Paul in, Kikhenna ding leh kithupisakna ziaak in bangmah hih kei un, kingainiam in mi

chih in ama sang in midangte hoih sa zaw hen, a chi hi. Kingaihniamna tuh i thil hih ut louh hihna ahi. Theikilkel kawm a lem i sakihi louh thupukna khat a kituklutna ahi. Inkuan kipumkhatna ding ahihnakleh eimah deihdan chi tentun lou a, midangte' deihdan lemsakihi vek keimahleng, zuih theihna tuh kingaihniamna ahi. Hiai bang a kingaihniamna tuh hatlouhna leh vuallelhna hilou in, hatna leh vualzohna ahi zaw hi.

11. A Nuam Leh Kipumkhatna Kibatsak Louh: Inkuan tamtak ah kipumkhatna omlou napi in, inkuan mite a pawlang in kamsiamtak in kihoupih thei uhi. Hiai ahihleh kipumkhatna sang a nopsakna thupi bawl zawk ziaak a thil om ahi. Kipumkhatna tuh a nuam toh kibang leh khat ahi kei. Inkuan kipumkhatna ding a thilhih teng thil nuam ahi gige kei. Nuam gige kei mahleh, inkuan kipumkhatna ding ahih nakleh thuakzohna neih ding ahi. Galatiate 2:11 ah Judate' mitmei a ven ziaak in Peter in Zentelte kiang a ann a nek zel pen a tawpsan mawk hi. Peter gamtatdan Paul in naktak a mohsa in a taihilh hi.

12. Kithuzaktuahna:

Theisiam dia kithuzaktuahna ding in pau tam sang in, ngaihkhia tam; thutawpna bawlpah sang in ngaihtuahna; mohsakna sang in hilhchetna a poimoh zaw hi. Nangmah na kigupna tawpsan inla, na inkuanpihte'n bang gen ut ahi ua chih na theihna

ding in na bil leh lungsim hong in ngaikhia in. Na lungtang tengteng in a thugente uh ngaikhia inla, itna leh kingaihniamna toh a thugente uh ngaikhia in. A thugente uh na theihsiamdan amaute hilh inla, ngaihkhel leh theihsiam louh na neihleh hilhchetna ding hun pia in. ■

BIBLE STUDY



Pastor Khamkhanchin Ngaihte, EBCC Zion Local Pastor

Text : EPHESATE KIANG A PAUL LAIKHAK SINNA

Thupi : Chibai Bukna leh Khrist a Kham Vualzawlrate



Thumapi: Simtute Chibai. Tutung a i sin ding bung 1:1-14 sung ah Paul in chiindan ngeina zui a saptuamte chibai buukna a bawlwawh in gingtute adia Jesu Khrist a Pathian in hotdamna thilgeel ana bawl thupitakte ziaak a Pathian phatna thu hon gen hi.

1:1-2. Chibai buukna: Chibai buukna in a khaktupa, laikhak a omte, ban ah Pathian apan vualzawl na thu a tuun kha hi.

Laikhaktu hihna:

Jesu Khrist' Sawltak: Hiai thumalte (adjective) Paul kigenchetna ahi. Amah neitu kuamah dang hilou in Jesu Khrist ahi chih a gen Chiang pah hi. *Sawltak/Apostle* i chih in asawltupa thuneihna

tawh a deihdan sem/gen dia sawlkhiak genna ahi. Sappau a “envoy” hiam “ambassador” (representative) chih in a genkha pen ding. Jesu Khrist in ama sik leh taang a Ama thuneihna koppih a tangthupha gen dia a sawl chihna ahi. **Pathian' deiham:** Sawltak ahihna amah utna ziaak hiam, mihing kuate hiam deihsakna ziaak hilou a Pathian seh leh namkip ahihna genna ahi. Hiai

mah tuh sawltak thuneihna kipatna ahi a, huai thuneihna mah zang in saptuamte a kem hi (Rom 1:1; 1 Cor 1:1; Gal 1:1).

Laikhak a omte' hihna:

Misiangthoute: Paul in Ephesa khawpi liantak a gingtute “misiangthou...” chi in a sam hi. “Mi siangthoute” chih Paul in gingtute genna dia a kammal deihtawh khat ahi (Rom 1:7; 1 Cor 1:2; 2 Cor 1:1; Phil 1:1; Col 1:2). Jesu Khrist a a dinmun/hihna uh genna ahi a, Khrist ziak a siangthou a pom ahihna uh (imputed holiness) gen hi. Laisiangthou a “siangthou” chih thumal thil, mun hiam gingtute tawh kisai a akizat Chiang a a gennop pen tuh Pathian adia vanzat siangthou hidia sehtuam chihna ahi.

Khrist Jesu a mi gin-om te: Ephesa khua a gingtute “misiangthoute” achih zawh in “Khrist Jesu a mi gin-om te” (those who are faithful in Christ) achi. “Misiangthoute” chih in Pathian mai a Khrist ziak a gingtute dinmun/hihna gen a, “Khrist Jesu a mi gin-om te” chih in Jesu Khrist adia gingtute hihna ahi. Jesu Khrist a muanna/ginna koih mite tuh Pathian etna dan ah misiangthoute ahi uhi (cf Kol 1:2).

Tang 2na: Paul hunlai a laithon gelh Chiang a zuihdan tangpi in Paul in Ephesa a gingtute tung ah vualzawlna pia hi. Hehpihna (grace) i chih Greek a *Charis*, Hebrew a *hesed* ahi a, huai intuh mikhial Jesu Khrist tungtawn a ngaihdamna tang mite lam a Pathian lainatna (hehpihna + itna) kiningching genna ahi. “Khamuanna” (peace) ichih Greek a *Eirene* ahi a, Hebrew ah *shalom* ahi. Salam leh khalam hinkhua a damna, lawhchinna leh masawanna lam a kaw k hi. Hehpihna leh muanna/lemna diktak bul Pathian ahi. Huaiziak in, gingtute lak a kihehpihtuahna leh kilemna a om theihna ding in Pathian mah a poimawh masa ahi gige.

1:3-14: Khrist a Khalam Vualzawlante

Tang 3-6. Mikhialte Pathian ta i suah theihna ding a leitung pianma pek a Jesu Khrist a teel a i omna Paul in hon gen hi. Jesu Khrist ginna tungtawn a Pathian tate suak a, Pathian adia siangthou, dembei, leh pomtak i hihna ahi.

Taang 3. “*I Toupa Jesu Khrist’ Pa leh Pathian.*” Hiai ah Paul in tomkim tak in Jesu Khrist Pathian’ Tapa ahihna hon

gen kawm in, gingtute toh akizopna hon taklang hi. *Phat in om hen* chih biakna i chi hiam vualzawlna (benediction) thumal ahi. English a *blessed* kichi ei Bible ah ‘phat’ in a ki let a, phattaak, pahtawitaak om sun Pathian ahi chih gennuam ahi. Thukhunthak ah Pathian tawh kisai kia a zat paukam ahi. Israelte Messia tuh kuamah dang hilou in Jesu Khrist, Pathian tapa ahihman in, amau gel kizopna giltak leh kipumkhat (cf Johan 10:30; 14:6,7) ahihna uh Paul in hon taklat ban ah tua Jesu Khrist tuh ei gingtute Toupa ahi achi.

Pathian phat a pahtawi ding ahihna ziak tuh “Ama’n van munte ah khalam vualzawlna chiteng in eite Khrist ah a hon vualzawlta hi” achi (v3b). *Khalam vualzawlna* i chih in tu damsung mahmah a leng gingtute’n i khalam hinkhua a i hamphatpih ding (spiritual benefits) Pathian apan i ngahte gen hi. Hiai khalam vualzawlna in a uapkhakte – Pathian adia siangthou leh dembei dia hon teelna, Pathian tate hiding a hon sehkhawlana, tatkhiaakna leh ngaihdamna, Kha piakna i chihte ahi uh. *Van munte* ah chih in khalam vualzawlinate kipatna Pathian ahi chih

genna paukam ahi. Gingtute hamphatpih dia Khasiangthou tungtawn a Jesu Khrist a Pathian nasepte genna leng achi theih. Paul in khalam vualzawlana achi chiitchiatna in hiai vualzawlinate gingtute lunggulh pen khovel hauhsakna leh neih leh lam tawh kisai himasalou ahi chih hon theisak.

Bung 1: 4-6. Paul in 1:3 ah Pathian phat taak ahihna a gen zawh in tu in tang 4na ah Pathian phat taak ahihna ziak hon gen beh a, huai tuh, leilung pianma pek apan ahonna teelna ahi. A hon teeltu/sepkhawltu Pathian ahi a, Jesu Khrist tatna tungtawn a a hon teel ihi. A hon teelna in a tup ahihleh Pathian mai a *siangthou leh dem kailou* a I omna ding ahi (cf Lev 11:44; Col 1:22; Eph 5:27; 1 Pet 1:16). “Pathian in a hon teelta” (God chose us) chih Thukhun Lui hun a Abraham, Jacob Mosi, chihte ana teelna a kampau kizang tawh kibang thumal ahi a, bangmah dang phutluh ziak hilou a, Pathian in Ama thu liauliau a a honna teelna genna ahi.

Pathian in a hon teelna tawh kisai Paul in a zat thumal

poimawh tuh “ta hiding a lakna” (adoption) ahi. Kros a Jesu Khrist tatna pom te teng ata hiding in itna ziaak in ahonna sepkhawh khinta hi. Pathian min phat in om hen (cf. 2 Samuel 7:14).

Bung 1:7-12. Jesu Khrist ziaak a khelnh ngaihdamna i tan Pathian phatna ding ziaak khat ahihdan Paul in hon gen nawn hi. Bung1:3-6 ah hun paisa a thiltung genna (Aorist tense) hon zang mahleh tu in (1:7-12) ah tuhun a thiltung genna thumal (present continuous tense) hon zang hi. Redemption (tatkhiaakna) kichi thumal in a gen ahihleh saltanna apan man pia a tatkhiaakna ahi.

Tang 7na. “A sisan ziaak in” chih in tatkhiaakna man (price) Jesu Khrist sisan ahi chih a chiangsak (Col 1:20). Khelhna sal a pan tatkhiaakna man a tam mahmah. Gingtute Jesu Khrist sisan a leisa ihi uhi (Gal 3:13; 1 Cor 7:21-23). Hiai tatkhiaakna tawh kiton a thumal poimawh kizang tuh *ngaihdamna* ahi. “I tateleknate ngaihdamna” chih in gamtat gilou hiam gitlouh nasepte (sinful acts) maisakna/ngaihdamna genna ahi.

Tang 8-10. I tateleknate ngaihdamna leh khelhna sal

a pan tatkhiaakna tuh Pathian hehpihna kiningching ziaak ahi chiin Paul in a gen hi. *Huaimah tuh* achih in ama a *a hehpihna hauhdan* (t 7) a genna ahi. Pathian hehpihna hamphatpiping in Amah tawh kizop a poimawh hi. Pathian in A tate tung ah a hehpihna chiillou in a pia/langsak hi (Romete 5:20). Khelhna apan tatkhiaakna kia hilou in, Khrist a a thusim kiseel(mystery) te I theihshiam theihna dia pilna leh theihshiamna a hon piakna in (t9) Pathian hehpihna kiningchinna a taklanghi. Tang 10na a kigen in tang 9na a kigen a hilhchian hi. *Hunbi a hong kim Chiang* a chih in Pathian hun seh (God’s appointed time) genna ahi. Greek ah hun genna nih – *Kronos* leh *Kairos* a om a, hiai ah Paul in *Kairos* (Kairawn) a zang. Huai tuh hun sehtuam/hun biik genna ahi. Pathian deiham thilgeel (mystery) hun paisa a seel a om (hidden), tua gingtute theih dia Khasiangthou tungtawn a lahkhiak a om tuh -Pathian hun seh ah Pathian mahmah in leitung leh huihkhua a thil teng Jesu Khrist thuneihna nuai ah a gawmkhawm ding chih ahi(t10). Mihing hi in Pathian kalh dawh/kha gilou (spiritual

forces) te teng Jesu thuneihna nuai a bawlem a om ding genna ahi. Huchia Jesu Khrist tuh bangkim tung a thunei pen ahihtheihna ding in.

Tang 11-12. Ama tup leh ngiim/deihna tawh kituak a Pathian in Jesu Khrist a gingtute ama gouluah dia honna teel ahih dan Paul in gen hi. “Amah mah a sehkhoh a om in” chih in Jesu Khrist a Pathian’ hon teelna/sehkhawl na a gen hi. Ei Bible a “i gouluah ding i muta uhi” kichi English ah *in him we have obtained an inheritance* (ESV) achi a, NIV in *In him we were also chosen* achi. Pathian in gingtute Jesu Khrist a ama’ a, ama goutante (possessions) hidia ahon teelna (election) genna ahi (cf: Deut 4:20; 7:6; 14:2). Sehkhohna (predestination) i chih Chiang in a hun amun tawh kituak a nasep genna hilou in sawtpi apan hoihtak a geelkhoh leh tup a omsa ahihna genna ahi.

Tang 12na ah Paul in Pathian hon sehkhohna in a tup ahon genlang hi. Paul in “koute” achi in amah leh a seppih/ a omkhawmpihte genna leh tang 13na a “noute” achi in Ephesa a gingtute genna a pom a dikpen ding. A thupina

phat ding a Pathian in honna sepkhawl ahi chi in Paul in a gen. Thil tengteng ama lunggel bang a semkhepa, Pathian bangkim hihthei, ahihna phawk a phatna piak ding tuh gingtute hinsan ahi.

Tang 13-14. Thutak (gospel) za a gingta kuapeuhmah a gintak dakkal un Khasiangthou in luah in tenkhum hi. Tua genna in Paul in “Khasiangthou a chiamteh in na om uhi” achi hi. Chiamteh (sealed) chih thumal Kumpi lai poimawh tung a a chiamtehna leh namkipna dia Kumpi seal ki tat-zel genna kammal ahi. Hiai thumal poimawh tak in gingtute Pathian in Jesu Khrist a ahon teelna leh sehkhohna a muanhuaina/bitna (security), a takna (authenticity), Pathian’ aa hihna (ownership), leh thuneihna (authority) a gen hi. Tang 14na a *khamkhohna* (deposit) chih thumal in a gen ahihle, banghiam van khat i lei dek Chiang a a khamkhawl na a (down payment/advance payment) i piak sek dan genna ahi. Huaituh, Khasiangthou pen Pathian’ aa i hihna leh Khrist a Pathian gouluahtu ding i hihna chiamtehna ahi chihna ahi. Pathian ta i hih

chiamtehna a Khasiang thou piak i hi chile a dik ding.

Conclusion:

Ephesa 1:1-14 sung ah Paul in Jesu Khrist a gingtute'n i tan hamphatna leh vualzawlnate a hon taklang hi. Pathian in leilung pianma pek apan in Jesu Khrist ah eite ginna tungtawn in ata, a gou, ama a

hiding in a honna sepkhin hi. Huai khamkhawlna (advance payment) tuh Khasiangthou ahi. Pathian' ta i hihna a muanhuai in a kip mahmah hi. Huaiziak in, Pathian' ta leh a gou manpha i hihna phawk a, niteng a Pathian phat a pahtawi ding tuh i mawhpuakna ahi. Toupa'n hon vualzawl hen. ■



Gammial Aw

Mangthangte zong a Hondam ding a hongpai i Toupa leh Hondampa Jesu Khrist min in Gammial Aw simtute tengteng chibai aw! Field tungtawn a Pathian missions i sepna tuchiang chiang i etleh mun khenkhat i sepnate kihong mahmah a batlai in mun khenkhat ah zalentak a septheih nawn ding banglou hial in awlawl a hong kikhak ding bang in muhtheih in om hi. Himahleh, Toupa gamna sem a field a i kalsuannate melmapa'n dou theihna lamchi tuamtuum zong a douding a panla in pang mahleh, tua tengteng zoh theihna leh hatna nei Pathian hing nei Khrist nungzuite i hihman in lungliapna ding omlou hi in i mu hi. Toupa gamna sepna kahiang poimohtak hong hihngei lametna toh saptuam in NDPN Ministry kum 2023 in i na pan hi. Tu in, hiai tungtawn in Pathian in tuailai tampitakte nekzonna kichiantak a neihzoh nung ua Nekzonna Dohkan pen pulpit a zang a Khrist theihpihna nnasem ding honpia a i kipak mahmah hi. Khovel khangtou zel ah Pathian gamna i sepdan bang leng hong kikhektou ding hong bang ahihna ah hiai NDPN Ministry leng tangthupha puanzakna kahiang poimohtakte lak a khat hong hih ngei i lamen hi. NDPN Ministry nuai ah tuailai tampitak Pathian gamna sem nuam a kalsuan omlelte hong lohchin ua, Pathian leh saptuamte a ding a khuam muanhuai hong hihtheihna ding un thumna ah delhzui zel ni.

Toupa'n Field tungtawn a i sepna hon vuaksuak saklou ahihdan leh semtute ban ah thumtute leh thilpiak a na pang gige A misiangthoute thumna tungtawn a gah hon piaknawn hiai anuai a te enkhawm nawn ni. Field kalsuanna agahsuah a, khamangthang tampi Jesu Khrist khebul a pilut ahihtheihna ding in A misiangthoute'n mohpuakna goltak nei i hi chih manghilh kei ni.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n field a semtute kalsuannate hon vuaksuak sak lou in gingthak 14 leh baptisna tangthak 9 hon piak nawnte ziak in kipahtu gen ni. Gingthak leh baptisna tangthakte a khalam uh hong pichin sem ua, Toupa a ding a nungzui muanhuai leh midangte Toupa khebul a tonpihtu hotdamna vanzat a hong hihtheihna ding un thumpih ni.
2. Field tungtawn a i sepna gah i muh zelte a pan i thumna leh thilpiakte thawnlou ahi chih muhtheih in om hi. Pathian kiang ah kipahtu i genkawm in, thilpiak leh thumna a na pang gige saptuam mite leh semtute thumpih zel ni.
3. Semtute'n a omna mun chiat ua sepding mohpuakna piak a om bangbangte semzom theizel uhi. Maban a Pathian apan puakgik piak a omte chidamtak a a sepkiak theih zel ua, poimoh om bangbangte saktuahsak ahihzelna ding un thumpih ni.
4. Toupa'n gingthak hon piakte khalam kalsuana ding uh gingtu na hisate apan huhna leh kithuahpihna poimoh petmah uhi. Amaute a innkuan kuan ua gingtu hivek lou ahihman un a khalam khantouhna ding ua a kalsuanna ding uh baihlam lou ding ahihna ah nakpitak in thumpih ni.
5. Himalayan Missions Field sung a om Sikkim, NEBC leh Central Nepal a semtu Pastor leh Evangelistte'n Pathian apan khalam vualzawlina leh Khasiangthou thopna thupitak a tan sem theihna ding un thumpih ni.
6. Field a Saptuam leh Fellowship omlelte khalam a hong khan semsem a, Khrist nungzui muanhuai leh mite adia vualzawlina hong hihtheihna ding un thumpih ni. Saptuam heutu leh makaite'n Toupa apan huhna, a belamte chingtu hiding a thopna tamsem atan theihna ding un thumpih ni.

B. DHEMAJI MISSIONS FIELD

KIPAHTHU GENNA LEH THUMNA DINGTE:

1. Toupa'n field a semtute kalsuanna vualzawl zel in gingtute lak apan Mimal Missionary vakna a pang ding EBCC Namgharia ah innkuan 11, Kapurdhuwa ah 3 leh Bongalmari ah 3 bang hon piakziak in thupi sa mahmah hi. Kipahtu gen in, a sawlkhia saptuamte kia Missionary Vakna a pang hinawnlou a i sepna mun a gingtute apan hiai bang panlakna muh theih a hong omzelte ziak in kipahhuai i sa mahmah hi.
2. EBCC Kapurdhuwa a Dorka pawlte'n Toupa'n gingthak hon piakna ding a thumna a neih uh buaina omlou in sunzom theizel uhi. Kipahtu gen in, thumnate dawn a hong om a semtute sepna tungtawn a gingthak tamsem piak a i omna ding in thum ni.
3. February 18, 2024 in EBCC Namgharia ah Nupa Seminar neih in om hi. Hiai hun in Rev T Paununsang, Field Superintendent Seminar pitu in pang a, Nupa kop tamtak kihel thei uhi. Programme lohchingtak a zoh ahih ziak a kipahtu gen in, hiai hun a tel nupa kopte'n athu sinte uh a hinpih theihna ding un thumna in phawkzom ni.
4. EBCC Lachangaon ah koppih zonna toh kisai February 25, 2024 in Seminar neih in om a, hiai hun ah Evan H Jamkhanmang Seminar pitu in pang hi. Seminar hun ah tuailai tamkhop ban ah nu-le-pa bangzah hiam kihelthei uhi. Programme lohchingtak a zoh a omthei ahihman in Pathian kiang ah kipahtu gen ni.
5. Tanchinhoih doudaltute ziak a Toupa gamna sepna abah louhna ding in thum ni. Gingu omsate'n leng a ginna uh hangsan leh linglou hial a Pathian hanta muang a hong kalsuan zel theihna ding un thumpih ni.
6. Field a semtute'n Pathian thu a a houlimpih theih ding uh mi piak a om zel ahihna uah kipahhuai i sa hi. Himahleh, sahkhuaana toh kisai ahihchiang in pilvanna ding tampi om ding a, doudalna nasatak tuah theih gige ahihna ah semtute Pathian in a humbitna ding in thumpih zel ni.
7. Field in maban ah EBCC Bongalmari, EBCC Namgharia, leh EBCC Lachangaon munte ah Saptuam membrete group a khen in Saptuam Thugin leh Paidan toh kisai kisinsakna hun zatpih

sawm uhi. Hiai hun in sinsaktu in Pastor S Thangbiakmang pang ding a, Kisinsakna manpha ahihna ding in sinsaktu ding leh atel ding saptuamte thumpih ni.

C. MANIPUR MISSIONS FIELD

KIPATHU GENNA LEH THUMNA DINGTE:

1. Manipur gamsung buaina in field a nnasepna naaktak a hon nawkziak a nidang bang a semthei nawnlou himahle hang Field a semtute'n amau hihtheih khomkhom a kalsuan in lametna khel ah Toupa'n hon pi a, gingthak leh baptisna tangthak ding buaisung a hon piakte thupi i sa mahmah hi. Pathian in thumnate hon dawng zel ahi chih i phawk a kipahhuai sa in, maban field a semtute kalsuanna tungtawn a gah kipahuaitak muh ahih zelna ding in thum ni.
2. Manipur buaina ziak in Field Executive Committee thupukna bang in Manipur Missions Field nuai a Native Casual a semtute tu April kha apan khawlta ding uhi. Amaute ziak a kipathu gen in, Toupa'n ama uh a pizelna ding in thumpih ni.
3. MEBC Toubul a gingtu Mr L Sana a Kal leh Sin lam buaina ziaikin RIMS ah ki-enkol in om, damna hoihtak a muhna ding in thumpih ni.
4. April 16-19, 2024 sung Guwahati ah Missionary Conference neih in om ding hi. Kumdang bang a saptuam pumpi huap a khawmpi thupitak a neih theih ahihlouh ziak in Missionary teng kihel theihna ding ngim in Guwahati mun ah khawmpi neih in om ding hi. Hiai hun ah Field a semtu Pastor teng leng kihel ding uh chih ahihman in buaina leh daltu omlou a zinkhia a, programme a manphatak a a kihel theihna ding un thumpih ni.

D. HOJAI MISSIONS FIELD

KIPATHU GENNA LEH THUMNA DINGTE:

1. Toupa'n naupangte lak a Home Tuition tungtawn a field a i sepna hon vualzawl zel kipathu gen ni. Nidang bang a semtute'n Ministry nei a a kalsuan bang ua kalsuan ding thil haksapi hong bangta ahihman in lemgel siamna semtute'n a neihna ding un thumpih ni.
2. February khasung in semtute'n Meitei khua mun tuamtuum pha in thumsakna leh Gospel tracts hawmna nei uhi. Tua ban

ah, Mainapathar khua pha in tuition naupangte inn veh in amaute adia thumsakna neisak thei uhi. Tua ban ah anu-lepate uh kiangah Gospel tracts pia in, Meitei khua mah Udaipur leh Govinpur ah mi tuamtuam houlimpihna leh tracts hawmna neitheh ahihman un manpha i sa a, thumpih zel ni.

3. Field a semtute'n Year Plan leh khateng a Ministry plan ding a bawlte uh a hunhun a lohchingtak a a sepsuah zel theihna ding un thumpih ni.
4. Hunthak a semtute'n tuition tungtawn a naupangte lak a nna a sepna uh naaksem a pan hon lak ua, naupang leh anu-lepate uh Jesu khebul hon tut theihna ding un Khasiangthou thopna leh ompihna ngetsak ni.

E. DIMA HASAO MISSIONS FIELD

KIPAHTHU GENNA LEH THUMNA DINGTE:

1. Assam Government in Khristiante nasatak a dou dal a panla himahleh semtute'n Pathian thu gen sunzom theilai ahihman un kipahtu gen ni. Melma setan in tangthupha genna naktak a dou dal sawm a panla den ahihdan muh theih a om zia k in semtute'n Pathian ompihna toh kal hon suanzel theihna ding un thumpih ni.
2. Field a tuition tungtawn a Pathian gamna sep nate subuaitu bangmah omlou a paitou theizel kipahtu gen ni. Tuition naupangte lak a khenkhat Sunday fellowship a kihel thei omte zia k a kipahtu gen in, fellowship a kihelna tungtawn ua Jesu Khrist hondampa ahihdan hon muhchianna ding un thum ni.

F. GOALPARA MISSIONS FIELD

KIPAHTHU GENNA LEH THUMNA DINGTE:

1. Field a semtute'n Ministry a neihzel theih ban uah houlimpih ding ginglou mite a vangkim a neitheh zel ahihman un kipahtu gen ni. Maban a houlimpih a omte toh kizopna hoihsem leh Pathian thute hon genpih theihna ding un thum ni.
2. Tulai in semtute'n sepding dan lam tuamtuam masuan lel uhi. Tua ding in, Project Based pansan a sep ding dan geel in kisa le uhi. Pathian gam keklet ahih theihna ding lampi hoih tak hon muh theihna ding un semtute thumpih ni.

3. February 28-29, 2024 sung Assam Mission Field thak a om semtute a ding in Workers' Motivation Program nuamtak leh manpha tak mai SDV Campus, Guwahati ah neih in om hi. Hiai hunsung in Resource Person in Rev. Dr. S Vung Minthang, General Secretary, EBC pang a, "The Master's Call and Demands: Obedience and Sacrifice" chih thupi zang in thu manpha tak field a semtute'n a zatpah theih ding uh practical tak in sinsakna hun zang hi. Hiai hun a sinsakna piak a om semtute'n field a manphatak a zatkhiaq pah theihna un thumna toh delhzui ni.

G. KAMRUP DISTRICT & GUWAHATI PANSAN A SEPNA

KIPATHU GENNA leh THUMNA DINGTE

1. Loharghat Station mun pansan a semtute'n Pathian pina toh amau mohpuakna bangbang semzom thei zel uhi. Pathian thu toh houlimpih theih ding piak in om zel ua tuate houlimpihna neihpih theizel ahihna uah manpha i sa hi. A gam mite toh kimeltheih tuahna om masa lou a, Pathian thu houlimpihna neitheih hilou ahihna ah houlimpih theih ding mi semtute piak ahihzeln a ding un thumna ah phawk ni.
2. Semtute area tuamtuan a pai a houlimpih theih ding zong a kalsuan zel ahihna uah thumpih poimoh mahmah uhi. Tua ahihman in, maban a a kalsuanna ding uleh houlimpihsa a neihte uh lohchingtak a hon suzop zel theihna ding un thum ni.
3. Chaigaon station a semtute'n Rabha mite lak a sem in, amaute veh in testimony tungtawn a Khrist tanchin genpihthei panpanta ahihna uah manpha i sa hi. Ban ah, naupangte School a khawlsung ua innveh a kalsuan ding a tup uh thumpih ni. Naupangte nu-le-pate toh kimeltheih tuah a awlawl a tanchinhoih genpih ding chih semtute'n tup leh ngim aneih uh lohchin theihna ding in thumna toh delhzui ni. Tanchinhoih tangkoupihna ah semtute'n Pathian apan pilna hon ngah ua pilvangtak a kal hon suanzel theihna ding un thumpih ni.
4. Missions Centre, Guwahati pansan a semtu i neih mi thumte'n Pathian ompihna toh amau mohpuakna chiat sem in tha ittak in pang chiat uhi. Pathian ompihna toh sepding a mohpuakna a neihte uh kuhkal leh chihtak suah a hong pang ua hon sepzom zel theihna ding un khalam leh salam chidamna ngetsak ni. ■



DORCAS *Corner*

Pathian hehpihna toh kha lina April – 2024 bang tungtou theinawn in i omta, a min i phat hi. Simtute na vek un Hondampa Jesu Khrist min in chibai k'on buk hi.

Pathian in Israel tate a it mahmah ziak in Aigupta a a saltanna ua kipan a pikhe ding in Mosi sep hi. Mosi leh Aron in Pharo kiang ah mite paisak ding in a vangen zel uhi. Himahleh Pharo in phallou in, Israel tate' nasep ding behlapsak zomah in a genthei sak semsem hi. A tawp in Mosi Pathian kiang ah, Toupa, bang dia hiai mite hichibang a gilou suaksak na hia? Bang dia kei honsawl na hia? Na min a thu gen dia Pharo kiang a ka vahoh nungsiyah lah, ama'n hiai mite tung ah thil gilou a bawl ngal a. Na mite lah na pikhe hetkei" chi in a phun hi (Exo. 6:22). Toupan Mosi a dawng a, Abraham, Isak leh Jakob kiang ah ka kilakta a himahleh ka min Israelte lak ah Jehovah in a lak uah theih ka hikei, a chi hi. Toupa'n Israelte'n a theih ua, Aiguptate' sal a kipan a suakta saktei AMAH kia ahi chih a theih ding uleh a thupiakte mang a huai a muanna nga ding leh kithutuak a a om ding uh deih mahmah hi. Huaiziak in a thukhun a mangngilh kei a mipite lak a dingh a a kilak ding thu Aiguptate puakgik nuai akipan a lakhepa Toupa a Pathian uh ahi chih a theihna ding un Mosi kiang ah gen hi. Toupa'n a thuchiam bang in Pharo lungtang khauhtak in om mahleh Mosi zang in Israelte Aigupta a kipan pikhia hi. Aigupta gam apan Israel suante a hong paizel ua, Sinai gamdai a hongtung uhi. Huai ah puanin a kai ua, Mosi kiang ah Pathian in Israel suante leh Jakob inkote kiang a gending thu pia hi. Toupa thugen hiai ahi: "Aiguptate tung a ka hih leh muvanlai khate a k'ontuah, keimah kiang ngei kontut dan na muta uhi. Huaiziak in tuin, ka aw na man taktak ua, ka thukhun na zuih taktak uleh, lei tengteng kei a ahihziak in mite sang in kei ading in gou tuambik na hi ding uhi. Kei a ding in siampute, lalgam leh nam siangthou na hi ding uhi. Hiai thute Israel suante kiang ah na gen ding a hi" a chi hi. Mosi a hong a mite upate a samsak a, Toupa'n amah a piak hiai thu tengteng a ma uah a luita hi. Mi

tengteng in kituaktak in a dawng ua, “Toupa thugen tengteng ka hih ding uhi”, a chi uhi (Exo.19:4-8). Hiai huntak a Israel tate lungsim munkhat, kipumkhat a Toupa thuzui ding a a kipiakna uh thupi petmah hi. Kuamah a hel leh phengphi omlou in kituaktak in Toupa thugen tengteng hihding in lungsim munkhat pu uhi. Mosi in mipite thu Pathian kiang a tunnawn a, maban a a khosak dingdan uleh a sep ding uleh kikep dingdan hih beh hi.

Unaute tuni in, Toupa thupiak hihding a chihte eite'n leng lungsim munkhat pu in a thumang ding, muan leng muang ding in i kichial hi. Pathian thupiak i muanna in eimah hinkhua ah a hon hotdamna a chiansak hi. Huan a thupiakte i zuih leh huai ah amah i thei chih i kithei hi (1 Jn.2:3). Thumanna in Pathian ta i hihna a chiansak a, a tate amah deihna bang a hing ding in hon lamena huai a hon lamet bang a hinkhua zatding chih eimahmah in leng i theichian hi. Tuaban ah, Pathian thupiak muang a a thu i manna in eimah hinkhua hon khek lamdang in thutak a hing ding in hon pi hi. Pathian thutakna koppih in itna a hon pi a, a deihlam sep utna lungtang hon guan a, Jesu'n ei hon it ziak a hong kipumpiak dante hon theisiam sak hi. Pathian in Israel tate a it bangbang in hon it a, khelhna sal (Aigupta sal) a kipan in Jesu Khrist tungtawn in hon suakta sak ta hi. I Toupa Jesu'n a PA' deihlam sep nuam a sak bang in ei a nungzuite'n Jesu bang in Pathian deihlam i sem ding uh aw. Pathian i it leh, a thupiakte i zui ding a, tuabang a a thu i man leh Pathian i itna huai ah a kilang ding a, AMAH toh pumkhat in i omkhawm ding hi. Pathian thupiakte zui a muanna koih a kipumkhat chiat ding in Toupa'n hon vualzawl hen. ■

JUBILEE NGAIH DAM THUPUAN: EBC Kumsim Khawmpi 75na a EBC Headquarter in Jubilee thupuan a kingaihdamna bawlthei te a ding a kong hon ahihtoh kitoh in EBCC Central Delhi a Saptuam member Pa M Pauminsang Guite-te inkuan in Pathian hoihna leh vualzawlina a tante uh phawk in 'Leiba-Sangba' Rs 1,00,000/- (One Lakhs) only January 06, 2024 in NGAIH DAMNA ana bawl uhi. Hiai bang a kalsuanna thupi mahmah in Pathian kia in thupina a tanna ding in hiai ah i taklang hi.

SAMTUAM PHUNGVUHNA: Upa Tualzapaute inkuan in Toupa hoihna tung a kiphathugenna leh Saptuamte phungvuhna hi dingin EBCC Central Delhi local Saptuam in a poimoh leh kul a sakna ua zat ding in March 03, 2024 in Rs. 1,00,000/- (One Lakhs) only pia hi. Hiai bang a Upa pa te inkuan a kalsang suanna leh kipiak zohna thupi sa in Pathian kia in thupina a tanna ding in hiai ah i taklang hi.



CHILDREN'S *Corner*

KHRISTIAN GALVAN | (*Ephesate 6:10-18*)

Galvan poimohte tuh galdouna mun a omte ahi uhi. Galdou hun in galvan a poimoh gige a, Galvan tellou a galzoh kichi thil hitheilou toh kibang ahi. Gingu eite leng chiklaipeuh a melma Setan galdou i hi uhi. Bangziak hiam i chihleh eite tuh Pathian' tate i hi ua, huaiziakin Satan in hon dou gige hi. Satan' nasep tuh Pathian in a batpih a asiamte khempuk leh suksiat ding ahi a, hunteng in melma satan in hon dou gige hi. Huaiziakin, Laisiangthou in a gen Pathian galvan bukim a kithuam gige ding ahi. Pathian thu in ***“Diabol zekhemnate na dou zoh theihna ding un Pathian galvan kim in kivan un”*** achi hi. ***Ephesate 6:11***



Satan in gingu Khristiante tuh douna tuamtuam in hon dou gige a, huaite lakah khenkhat ensuk ni:

Pathian i muanna uleh i ginna uh hon hatlou sak ut hi. Huaiziak mah in Adam leh Evi te ana khempuk hi (Gen. 3:1-5)

Khalem leh salam i hinkhua buaisak a, Pathian thu ngaihsaklou ding leh, a deihbang a khalem hattak a hing lou ding in panla hi (Thes. 2:18)

Khristian te lakah gindan diklou, Pathian sanga thildang te gintak zawk theihna ding leh thutak pialsan theihna ding in panla hi (Eph. 4:14)

Pathian adia pankhopna leh hatna ding sangin kikhenna ding leh kimuhdahna ding in panla hi (Jn. 17:11)

Pathian thu sanga i hihtheihnate muangzaw a kisatheitak a i omna ding in panla hi (Pau 3:5)

Hiaidan a melma Satan in panla ahihman in eiten leng amah i dou zohna ding ua pan nasatak i lak ding uh ahi. Panlak dingdan te hiai a nuai a bang ahi.

THUTAK KAWNGGAK DING: Kawnggak gak in tuh mansa a om chih a ensak hi. Khristiante tuh i ginna uh thudik (Laisiangthou) a kifulphuh ahihman in i hihna tengteng leh i ngaihtuahna leh i kampau leh bangteng a thutak a kifulphuh leh kip a hih gige ding uh ahi. Huai thutak pansan a Daibol zekhemnate dou dinga mansa a om gige ding a poimoh hi.

DIKTATNA AWMPHAW: Galdoumi ading a kihumbitna poimoh mahmah tuh awmphaw ahi. Huai in taksa kahiang a poimoh mahmah Lungtang leh awmguhte a humbit thei hi. Kham galdouna a tua banga hon humbit ding awmphaw tuh Diktatna ahi. Hiai a diktatna kigen tuh mihing lam apan suak leng hi masa lou in, Pathian apan suak, a Tapa Jesu Khrist tungtawn a i neih diktatna gen ahi hi. Bukimlou mihingte, i bukimlouhnate mah zanga melma Setan douna leh ngohnate apan i suahtak theihna ding in, Khrist Jesu a om tua diktatna pen ei a ahih ding a kiphamoh hi. Huai mah awmphaw a zanga, i lungtang khamuangtak a omsak ding leh i ngaihtuahnate kem siangthou dingin Pathian in hon deih hi.

TANCHINHOIH KHEDAP: Galdoumi a ding in khedap kichi kivatna poimoh tak ahi. Huai in i dinna ah nungtolh lou a i dinkip theihna ding leh, i kalsuanna nakpitak in hon panpih hi. Kham galdouna ah huchi bang a i khedap ding tuh Tanchinhoih ahi. Tanchinhoih tuh i kifulphuhna ding leh i kalsuanpih ding ahi a, i hamphatpih ding kia hilou in i paisawn sak ding ahi.

GINNA LUM: Nidanglai a galdou sepaihte kivatna poimohtak khat nawn tuh "Lum" ahi. Sawltak Paul in a biik in Rome Sepaihte kivatna lungsim a thei kawm a a gelh hiding in gintak huai hi. Huai Lum tuh Galdoumi a ding in thaltang hattak

a lengte akipan kihum bitna ding leh, galte toh kimaituah a kihonsual khak huna nawkna dinga vanzat ahi. A tangpi in Lum kichi sing a kibawl ahi a, a kawt chiang ngial in houh, thaltang kuangtheite nangawn sumit thei kichi hi. Kham galdouna ah tuabang a ikivatna ding Lum tuh 'ginna' ahi. Hun khenkhat a melma Setan in Pathian ah i muanna nangawn hon subuai in, ginlahna, muanlahna toh hon omsak thei hi. Himahleh, ginna in hiaibang hunah hon panpih thei a, melma Setan khemna sangin Pathian in ei adia ahon chiam thupi zaw ahi chih hon musak thei hi. Ginna in, Pathian thuchiamte mihing a dingin, baihlamtak a muh leh theihtheih in omkei mahleh, Pathian; a thuchiam ah muanhuai ahihdan leh muan ding ahih dan hon theisak hi.

HOTDAMNA LUKHU: Hiai lukhu tuh puan lukhu maimai te hilou in, siik a kibawl ahi a, temsau hiam, thaltang hiam, siikzum hiam leh thautang nasan in a butlough lukhu ahi. I lutang pen i taksa kahiang dang teng sanga poimoh zaw leh lauhuai zaw ahi a, hoihtak a kepbit ngai ahi. **Kham** ah, khemna a i pukloughna ding leh ginna a kiptak leh hattak a kal i suantheihna dingin hotdamna kichiantak a poimoh a, hiai i hotdamna tuh chiklaipeuh a i latsak gige ding i lukhu ahi. Hiai in Khrist ah hing tawntung i hihdan taklang hi.

KHA NAMSAU: A tunglam a i genteng tuh eimah hon humbittu dingte ahi a, hiai Kha Namsau tuh melma i douthuk theihna ding ahi. Melma satan i douthuk a, i zothal theihna ding in Kha Namsau zat ding ahi. Hiai Kha Namsau tuh Laisiangthou ahi. Namsau leh galvan zangsiamte'n a melmate uh zou ahimabhang un, Laisiangthou hoihtak a thei a, hinpah ten kham melma Satan zou gige thei uhi. Bangziak hiam i chihleh, Laisiangthou tuh Pathian' Thu ahi a, thudik ahi a, thilhihthei leh Satan leh a kaihzatamten chiklaipeuh a a zoh ngeilouh uh, a lauh mahmah uh ahi.

Hiaite banah lungsim tak toh kha a Pathian kianga thum gige ding ahi. Thumna in thil thupitak hihthei ahi a, thumnate Pathian in dawng ahiman in thum gige ding ahi. ■



EBC Innsung Thu

1. EBCC Aizawl, Dinthar Building Complex 3rd Floor “**EBC Missions Guest House**” ding a bawl a om zoh ahihtak toh kiton in January 18, 2024 in a honna leh latna Rev Thawndoulain, DMn in nei hi. Tu in, hiai Guest House pansan a tungnuam omte a rate bikhiah bawl a omte zui in tuntheihta hi.
2. **Missions Inn**, Khominthang ah Inn bawlna paila a, tup dan a a paileh tu March a luahman ding a zohsawm ahi. Missions Inn tungtawn a i tup-le-ngiim ahileh Mission nasepna ziak a gam kuankhiate inlam a tenna inn toh kisai a haksatna omtheite panpihna leh hiai mun a zintunna leh inn tuam a neihma ua inn bang a a om theihna ding uh khualna a kibawl ahi.
4. Manipur gam buaina ziak in MEBC D. Phailian a member bangzah hiam omte leng buaina in nawkkha ahiman in, tu in saptuam memberte'n amau deihtelna bang in amau omna (area) local saptuam chiat uh bel in om uhi.

CRUSADE LOHCHINGTAK IN KIZOU: EBCC G Mawnglian in date 8-10 March, 2024 sung Crusade “**Na Pathian Tuak Din Kiman In**” **Amos 4:12** chih thupi a nei in Bialtu Pastor T Daikhankhup thugen in pang hi. Hiai crusade tungtawn in mi tamkhop in kipiakthakna nei thei uhi. Hiai ding a thumna a na pang, huhna thilpiak tuamtuum leh tualsung mite ziak a hiai bang a programe lohching tak a kizang thei ahiman in kipak in Pathian kia in thupina tang hen aw.

KIPAHTHUGENNA: EBCC Aizawl East Thuampui in Pathian hoihna leh dehsakna ziaikin EBC Headquarters tungtawn in tukum Pastor piak in ka om ua, ka kipak mahmah uhi. Pastor Quarters lamna ding toh kisai in Pa M Khamsuante innkuan in gam/innmun hon zatsak banah uah Headquarters in quarters hon lamsak ua, hiai ading van poimohte Saptuam, Department leh mi kiphal hon pekhawmte tung ah Saptuam min in kipahtu kon gen uhi.

- **K Sangliana**

Chairman, TBUC EBCC Aizawl East, Thuampui ■



Ordain Sunna

1. Min: **UPA PUMKHOCHIN HANGHAL**
2. Pianni: September 1948
3. Pianna Khua: Hanship
4. Baptisma: 1966
Baptistu: Pastor Kaineng
5. Pa Min: (L) H Vungkhotuan
6. Nu Min: (L)L Luankhoning
7. Zi min: Ngemkhovung
8. Kitenni: January 01, 1968
Kitengsak tu: Pastor Kaineng
9. Gil a gah goutan neihzah: 7 Pasal: 5 Numei: 2
10. Tu melmuh zah: 15 Pasal: 8 Numei: 5 Tusawn 2 tel in
11. Tulel a omna Saptuam: EBCC Zoan, Bethel Veng
12. Tulel a kizatna: TBUC Member
13. Ordain Kum: December 10, 2006
Ordain Petu: Rev Dr. B Luaichinthang
14. Pahtakna lai san kum: 2018
15. Toupa kiang a tawldam ni: February 08, 2024 Vui ni:
February 08, 202
16. Vuitu Pastor & Saptuam: Pastor H Kamzachin Area Pastor
17. Natna: Awmna
18. A tanchin gelbeh nop:



Hanship Saptuam ah Local Vice Chairman in term 2 ana pang a, School Committee, Building Committee, Missions Committee te ah leng ana pang hi. Khotang vai ah V/A member ah leng sawtkuam tak ana pang hi. Kimawllunglut leh football pek siam mahmah ahi a, a hatlai in Guite Kual a minthang mahmah hi. Tulel a a omna Saptuam ah Local Vice Chairman leh Missions Committee ah Chairman in ana pang ngei ta hi. A sihni dong a TBUC Member muanhuai mahmah ahi.

Amah mi kingainiam, Saptuam it leh thum mi, mi polhnuam, chiamnuih dongthei mi ahi.

*Toupa Khasiangthou in a nutsiat a inkuan leh Saptuamte
khamuan in makaih zel hen aw.*

1. Min: **UPA V GOUZACHIN**
2. Pianni: 1938
3. Pianna Khua: Bungpilon
4. Baptisma: 1942
5. Pa Min: Pu V Thongin
6. Nu Min: Pi Ningman
7. Zi min: Zelkhoman
8. Kitenni: October 16, 1959
9. Gil a gah goutan neihzah: 14 Pasal: 6 Numei: 8
10. Tulel a omna Saptuam: EBCC Bungmual
11. Tulel a kizatna: TBUC Member
12. Ordain Kum: 1987
13. Pahtakna lai san kum: 2008
14. Toupa kiang a tawldam ni: 02.03. 2024 Vui ni: 03.03.2024
15. Vuitu Pastor & Saptuam: Pastor L Khaikhansong, EBCC
Bungmual
16. Natna: Heart Case
17. A tanchin gelbeh nop:



Mi pian fel, melselou, siangthou fetfat leh mi taima khop khawk khat ahi, mi deihtui mahmah mi ahi a, Singsiam (mistry) khat ahi a, gamvak mi leng ahihman in gamsa tampi a damlai in makha hi. Laisiangthou sim leng lunglut mahmah hi, Saptuam sung a tanvou tuamtuum ah mohpuakna piak a om bangbang tha-it mahmah in sep theih bangbang in thanuam tak in semkhe jel hi, a tun zoh liai nak leh phalvak teng in biakin a hoh a atate leh tute a ding a thum gige mi ahi. Saptuam heutu hongzin/tung te vaidawn leh vadawn chih te kilawp mahmah mi ahi. Kum 2003 in Bungmual khua a peplut hi.

A zi a sap chiang in a mintawn ngen in sam hi. Thana nei mi ahi a kum 2001 in inn bawllai a tung a pan kia in a spinal tat kha hi. Imphal leh Lamka damdawi inn te a kikem den hi. November 12, 2011 in naktheilou in hong buai mahmah hi, heart case hoih neih mahmah operation a leng phatuam lou ding chi in damdawi in kikem tou den in Pathian hunseh march 02, 2024 in a muan Toupa kiang tawldam ta hi.

*Toupa Khasiangthou in a nutsiat a inkuan leh Saptuamte
khamuan in makaih zel hen aw.*





Kipahthu Genna THUMNA MAKAI

APRIL 2024

- 1 **SEPPATNI:** April ni 1 hon musak i biak Pathian kiang kipahthu gen ni. April 1-8 sung Thangbiaklal Valte, Music Promotor in EBCC Thuampui, Aizawl ah Music sinsak ding, thumna ah phawk ni. Evan H Thangkhansiam lawinu Vungthianmuan damlou a Delhi a ki enkol a omler, hong damna ding in thumpih ni.
- 2 **SEPNAWNNI:** April 4 in Grace Bible College (GBC) in Graduation Day zangding. Thugentu ding Rev Dr S Vung Minthang, GS leh vaisaite a ding in Pathian huhna leh makaihna ngen in thumpih ni.
- 3 **NILAINI:** April 4 in EBCC Kohima in kum 25 Silver Jubilee lawmding. Rev Thawndoulain, Director of Ministries in thugenpi hihna toh uapding, Program lohching leh manphatak a zoh ahihna ding in thumna ah phawk ni.
- 4 **NINGANI:** April 5-7 sung Simte Baptist Church, Beulahlane in chialpi neiding a, Evan Lianding Guite in Pathian thutak gending. Chialpi lohching leh gahsuh ahihna ding in Khasiangthou pawlna ngen in thumpih ni.
- 5 **SINTAWPNI:** Saptuam in tulel a high school i neihte; Mimbung English high school, Immanuel Academy, Teikhang, Convention English high school, Sinzawl, Ebenezer Academy leh Jiribam Model high school a suntu naupangte leh sinsaktute a ding in Pathian makaihna ngen in thumpih ni.
- 6 **KIGINNI:** Olive Retreat Centre Pathian huhna toh mi tampite a ding in vualzawlina mun hizel, Pathian kiang a kipahthu genkawm in, amun a semtute a ding in chidamna hoihtak ngen in thumpih ni.
- 7 **NIPINI:** Dhemaji mission field a sem Rev T Paununsang, Field Superintendent leh a seppihte ziaka kipahthu gen in, Pathian deihna banga honsepzom zel theihna ding un thumna ah phawk ni. Tuzan in Rev. V. Thangkhanmuan in EBCC College Veng ah hun zang ding thumpihni.
- 8 **SEPPATNI:** April 10 in Baptist Youth Fellowship Lamka Baptist Church, Hiangtam Lamka in Youth Leaders Orientation neiding ua, Evan Lianding Guite sinsaktu in pangding, thumpih ni.

9 **SEPNAWNNI:** April 10 in CEC meeting omding. Memberten Pathian deihna banga saptuam maban ding lung kituak tak a hongel theihzelna ding un Pathian ompihna leh makaihna ngen in thumpih ni.

10 **NILAINI:** EBC Headquarters level a sub-committee tuam tuam a mohpuakna neikhaten Pathian deihna banga a mohpuakna chiat uh hon sepkhiaik theihna ding un thumpih ni.

11 **NINGANI:** April 13 in Mizoram Division sunga Saptuam school omna teng LSC, TBUC leh semtuten CES Manual, 2023 kitheihsiamsakna Mimbung ah neiding ua, Central School Sub Committee (CSSC) in makaih ding. Program manpha leh lohchingtak a zat ahihna ding in thumpih ni.

12 **SINTAWPNI:** April 14 in Rev Thawndoulia, Director of Ministries in EBCC Itanagar veh in Upa telna leng neiphing ding, thumpih ni.

13 **KIGINNI:** April 14 apan May 21 sung EBC Pawpi tuamtuum USA a omte lak ah Evan T Damkothang in Chialpi neiding. Pathian kha pawlna leh makaihna ngen in thumpih ni.

14 **NIPINI:** Saptuam School omna khua chih a Local School Committee-te a ding in Pathian makaihna ngen in thumpih ni.

15 **SEPPATNI:** April 16-18 sung Guwahati ah EBC Missionary Khawmpi omdinga, Rev Dr S Vung Minthang, GS leh Dr Samuel Mungpu te thugenpi in pangding uh. Pathian kha pawlna leh makaihna ngen in thumpih ni.

16 **SEPNAWNNI:** Maban a MP kitelna ding ah diktak leh galmuangtak a vote khiak ahihna ding in Pathian kiang ah thum in ngen ni.

17 **NILAINI:** Gamsung buaina toh kisai a heutu vaisai ten Pathian leh mipite deihna bang a vai honsai ua, hon makaih theihna ding un tunglam pilna ngen in thumpih ni.

18 **NINGANI:** April 19-21 sung EBCC Newlane in Nungzuihna Chialpi neidinga, Evan Lianding Guite thugenpi in pangding. Nungzui muanhuai Toupan honpiakna ding in thumpih ni.

19 **SINTAWPNI:** April 20-22 sung Guwahati ah NE India a om EBC saptuamte a ding in Nekzonna Dohkan Pulpit Nasepna (NDPN) seminar omding. College students leh sepna tuamtuum neite telding a lam-et ahi. Lohching leh gahsuahtak a zat ahihna ding in thumpih ni.

20 **KIGINNI:** Sumkum thak a ding ihihna ah, Pathian in A nasepna ding hon piaksate a kipahtu gen in maban a leng a tamsem semthei ding in A vualzawlina ngen in thum ni.

21 NIPINI: Lamka North DS ding in Rev Dr M Khamkhanchin in mohpuakna lata a, Rev Ginmalsawm inleng GBC Principal ding in ana join ta hi. Amauten Pathian deihna banga a mohpuakna chiat uh hon septheihna ding un thumpih ni.

22 SEPPATNI: NDPN nuai a Coaching late leh vocational training leiten Pathian huhna toh lohchingtak a honzoh chiat theih ua, Khrist theihpihna nna honsep theihna ding un thumpih ni.

23 SEPNAWNNI: April 24-27 sung Delhi ah NDPN toh kisai seminar omding. Nekzonna dohkan pulpit a zangthei ding mi Toupan honpiak a, Khrist Lalgam keklet ahihna ding in thumna ah phawk ni.

24 NILAINI: School tungtawn a sem Evan teacherte ziak a kipahtu gen in, Pathian deihna banga naupangte sinsakna honpiakzel theihna ding un thumpih ni. Zingchiang in EBCC Bethlehem Tuailai te lak a Rev V Thangkhanmuan in hun zang ding thumpih ni.

25 NINGANI: Khominthang a Mission Inn i bawl zoh hita, NDPN nuai a Coaching kaite laisimna dia zat ahi a, Evan Ginkhenmung Guite in enkol lel hi. Hiaitan honpi Pathian kianga kipahtu gen in, manphatak a zat ahihna ding in thumna in delhzui ni.

26 SINTAWPNI: April 27-28 sung EBCC Chiaugal in Hotdamna Chialpi neidinga, Evan Lianding Guite thugenpi in pangding, Pathian Kha pawlna ngen in thumpih ni.

27 KIGINNI: April 27-28 sung EBCC Central Delhi in Saptuam ki makaihna toh kisai seminar neiding a, Rev Thawndoulain, Director of Ministries in sinsak ding, manphatak a zat ahihna ding in thumna ah phawk ni.

28 NIPINI: April 29- May1, 2024 sung NEBC kumsim khawmpi Birtamode ah omdinga, Rev Dr S Vung Minthang, GS thugenpi in pangding, Pathian Kha pawlna leh makaihna ngen in thumpih ni.

29 SEPPATNI: April 30 in EBCC Chandigarh in Upa telna neidinga, Rev Thawndoulain, Director of Ministries in makaihding. Toupa deihbang mi telkhiak ahihna ding in thumpih ni.

30 SEPNAWNNI: April khatawp tan honpi i biak Pathian kiang kipahtu gen ni. May 1 in Bangalore ah Nekzonna Dohkan Pulpit Nasepna (NDPN) toh kisai seminar omding. Hiai nasepna tungtawn a Pathian in a tanchinhoih mun tuamtuam leh mituamtuamte kiang a puanzak theihna ding kong hon honsak ahiman in kipahtu gen in manpha leh lohchingtak a kalsuan zomna ding in thumpih ni. ■

FORM IV
(See Rule 8)

Statement about ownership and other particulars of the Magazine
“KCHRISTIAN THUKIZAKNA”

1. Place of Publication : NewLamka, Churachandpur,
Manipur – 795006
2. Periodicity of its publication : Monthly
3. Printer’s name : S. Vung Minthang
Nationality : Indian
Address : NewLamka, Churachandpur,
Manipur – 795006
4. Publisher’s name : S. Vung Minthang
Nationality : Indian
Address : NewLamka, Churachandpur,
Manipur – 795006
5. Editor’s name : S. Vung Minthang
Nationality : Indian
Address : NewLamka, Churachandpur,
Manipur – 795006
6. Name and address of
individuals who own the
newspaper and partners
and shareholders holding
more than one percent
of the capital : The Evangelical Baptist
Convention

I, S. Vung Minthang, hereby declare that the particulars given
above are true to the best of my knowledge and belief.

Dated: New Lamka
April 01, 2024


S. VUNG MINTHANG
Signature of Publisher

Postal Regd. No. MNP 07 | Regd. No. 22344/70

BOOK POST



If undelivered, please return to

The Editor,
CHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India